

D.R, 17/91

Naskhah Sahih—Bahasa Malaysia

RANG UNDANG-UNDANG OPTIK 1991

---

SUSUNAN FASAL

---

BAHAGIAN I

PERMULAAN

Fasal

1. Tajuk ringkas dan mula berkuatkuasa.
2. Tafsiran.

BAHAGIAN II

MAJLIS OPTIK MALAYSIA

3. Penubuhan Majlis.
4. Keanggotaan Majlis.
5. Tempoh jawatan.
6. Saraan.
7. Kewarganegaraan.
8. Pengosongan jawatan.
9. Mesyuarat Majlis.
10. Prosedur dalam mesyuarat.
11. Jawatankuasa-jawatankuasa.
12. Akta Perlindungan Pihak Berkuasa Awam.
13. Pengkhidmat awam.
14. Kuasa Menteri untuk mengeluarkan arahan.
15. Penyata.

BAHAGIAN III

PENDAFTARAN JURUOPTIK DAN OPTOMETRIS

16. Pendaftar.
17. Daftar.
18. Orang-orang yang berhak didaftarkan sebagai juruoptik.
19. Orang-orang yang berhak didaftarkan sebagai optometris.
20. Cara pendaftaran.
21. Bidang kuasa tatatertib Majlis.

## Fasal

22. Hukuman tatatertib.
23. Siasatan.
24. Penyerahan balik perakuan pendaftaran.
25. Rayuan.
26. Pemotongan nama oleh sebab kelemahan fizikal atau mental.
27. Perubahan kepada Daftar.
28. Kemasukan semula nama dalam Daftar.

## BAHAGIAN IV

## AMALAN OPTOMETRI

29. Hanya orang-orang berdaftar sahaja boleh menjalankan amalan optometri.
30. Majlis boleh membenarkan juruoptik mempreskripsi dan mendispens kanta lekap.
31. Larangan terhadap penggunaan ubat dalam mengukur daya penglihatan.
32. Perakuan pengamalan lahun.
33. Penjalanan amalan tanpa perakuan pengamalan tahunan.

## BAHAGIAN V

## AM

34. Pendaftaran fraud.
35. Kesalahan-kesalahan.
36. Alat-alat optik.
37. Penalti am.
38. Kuasa untuk memasuki premis dan memeriksa dan menyita dokumen dsb.
39. Penjalanan pendakwaan.
40. Pertubuhan perbadanan dan perkongsian.
41. Kuasa Menteri meminda Jadual-Jadual.
42. Peraturan-peraturan.

JADUAL PERTAMA.

JADUAL KEDUA.

## RANG UNDANG-UNDANG

*ber nama*

Suatu Akta bagi mengadakan peruntukan mengenai pendaftaran orang-orang yang menjalankan amalan sebagai juruoptik dan optometris, bagi mengawal amalan optometri, dan perkara-perkara yang berkaitan dengannya.

[ ]

MAKA INILAH DIPERBUAT UNDANG-UNDANG oleh Duli Yang Maha Mulia Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut:

## BAHAGIAN I

## PERMULAAN

1. (1) Akta ini bolehlah dinamakan Akta Optik 1991. Tajuk ringkas. dan mula berkuatkuasa.
- (2) Akta ini hendaklah mula berkuatkuasa pada tarikh yang ditetapkan oleh Menteri melalui pemberitahuan dalam *Warta*, dan Menteri boleh—
  - (a) menetapkan tarikh mula berkuatkuasa yang berlainan bagi peruntukan-peruntukan yang berlainan dalam Akta ini;
  - (b) menetapkan tarikh mula berkuatkuasa yang berlainan bagi bahagian-bahagian yang berlainan dalam Malaysia.
2. Dalam Akta ini, melainkan jika konteksnya meng- Tafsiran.hendaki makna yang lain—
 

"alat optik" ertinya sesuatu alat yang direkabentuk untuk membetulkan, memulihkan atau meringankan apa-apa keabnormalan refraktif atau kecacatan optik pada penglihatan;

"anggota" ertinya anggota Majlis;

"Daftar" ertinya Daftar yang disimpan mengikut seksyen 17;

*Akta 30.* "institusi pengajian tinggi" ertinya Universiti atau Kolej Universiti yang ditubuhkan di bawah Akta Universiti dan Kolej Universiti 1971;

"juruoptik berdaftar" ertinya seseorang juruoptik yang didaftarkan di bawah seksyen 18;

"kanta mata" ertinya kanta yang digunakan untuk membetulkan, memulihkan atau meringankan apa-apa keabnormalan refraktif atau kecacatan optik pada penglihatan;

"Ketua Pengarah" ertinya Ketua Pengarah Kesihatan, Malaysia;

"Majlis" ertinya Majlis Optik Malaysia yang ditubuhkan di bawah seksyen 3;

"optometri" ertinya penggunaan kaedah-kaedah bagi mengukur daya penglihatan, atau penyesuaian kanta atau prisma mata untuk membantu daya penglihatan, atau kedua-duanya;

"optometris berdaftar" ertinya seseorang optometris yang didaftarkan di bawah seksyen 19;

"orang berdaftar" ertinya seseorang yang didaftarkan di bawah seksyen 18 atau 19 dan termasuk seseorang yang didaftarkan sementara di bawah subseksyen (3) seksyen 18;

*Akta 50.* "pakar oftalmologi" ertinya seseorang yang didaftarkan di bawah Akta Perubatan 1971 dan yang mengkhususkan diri dalam penjagaan keadaan mata;

"Pendaftar" ertinya Pendaftar yang disebutkan dalam seksyen 16;

"pengamal perubatan" ertinya seseorang yang didaftarkan di bawah Akta Perubatan 1971;

"Pengerusi" ertinya Pengerusi Majlis;

"Timbalan Ketua Pengarah" ertinya Timbalan Ketua Pengarah Kesihatan, Malaysia.

## BAHAGIAN II

### MAJLIS OPTIK MALAYSIA

3. Maka adalah dengan ini ditubuhkan suatu pertubuhan perbadanan yang kekal turun-temurun dan mempunyai meterai biasa dan yang boleh mendakwa dan didakwa atas namanya yang hendaklah dikenali sebagai Majlis Optik Malaysia. Penubuhan Majlis.

4. (1) Majlis hendaklah terdiri daripada anggota-anggota yang berikut: Keanggotaan Majlis.

- (a) Ketua Pengarah yang hendaklah menjadi Pengerusi;
- (b) Timbalan Ketua Pengarah yang hendaklah menjadi Timbalan Pengerusi;
- (c) dua orang pakar oftalmologi yang bermastautin di Malaysia, seorang daripadanya hendaklah dari sektor awam, yang hendaklah dilantik oleh Menteri;
- (d) dua orang optometris berdaftar yang bermastautin di Malaysia yang hendaklah dipilih oleh optometris-optometris berdaftar yang bermastautin di Malaysia;
- (e) dua orang juruoptik berdaftar yang bermastautin di Malaysia yang hendaklah dipilih oleh juruoptik-juruoptik berdaftar yang bermastautin di Malaysia;
- (f) seorang wakil dari mana-mana institusi pengajian tinggi yang menawarkan kursus atau program optometri, yang hendaklah dilantik oleh Menteri.

(2) Walau apa pun subseksyen (1), Majlis yang pertama hendaklah terdiri daripada anggota-anggota yang berikut:

- (a) Ketua Pengarah yang hendaklah menjadi Pengerusi;
- (b) Timbalan Ketua Pengarah yang hendaklah menjadi Timbalan Pengerusi;
- (c) dua orang pakar oftalmologi yang bermastautin di Malaysia, seorang daripadanya hendaklah dari sektor awam, yang hendaklah dilantik oleh Menteri;
- (d) dua orang yang bermastautin di Malaysia dan layak didaftarkan sebagai optometris di bawah Akta ini, yang hendaklah dilantik oleh Menteri;
- (e) dua orang yang bermastautin di Malaysia dan layak didaftarkan sebagai juruoptik di bawah Akta ini, yang hendaklah dilantik oleh Menteri;
- (f) seorang wakil dari mana-mana institusi pengajian tinggi yang menawarkan kursus atau program optometri, yang hendaklah dilantik oleh Menteri.

(3) Jika Pengerusi tidak dapat menjalankan fungsinya di bawah Akta ini atau mana-mana peraturan yang dibuat di bawah Akta ini kerana dia sakit, tidak ada di Malaysia atau kerana apa-apa sebab lain, fungsinya hendaklah dijalankan oleh Timbalan Pengerusi.

(4) Tanpa menjejaskan subseksyen (3), Pengerusi boleh mewakilkan mana-mana fungsinya kepada Timbalan Pengerusi yang, pada menjalankan fungsi-fungsi itu, hendaklah tertakluk kepada kawalan, pengawasan dan arahan Pengerusi.

Tempoh  
jawatan.

5. (1) Tertakluk kepada subseksyen (2), seseorang anggota yang dilantik atau dipilih di bawah subseksyen (1) atau (2) seksyen 4 hendaklah memegang jawatan selama tempoh tiga tahun dan layak dilantik semula atau dipilih semula.

(2) Menteri hendaklah, pada melantik anggota-anggota yang disebut dalam perenggan (c), (d) dan (e) subseksyen (2) seksyen 4, memastikan bahawa tempoh jawatan seorang daripada anggota yang dilantik di bawah setiap perenggan itu habis tempoh satu tahun lebih awal daripada tempoh jawatan anggota yang satu lagi yang dilantik di bawah perenggan yang sama.

(3) Jika jawatan seseorang anggota menjadi kosong sebelum habis tempoh jawatannya, orang yang dilantik atau dipilih untuk mengisi kekosongan itu hendaklah memegang jawatan selama tempoh jawatan yang belum habis bagi anggota yang jawatannya telah menjadi kosong itu.

6. (1) Tertakluk kepada subseksyen (2), seseorang anggota tidak berhak dibayar berkenaan dengan tugas-tugas atau fungsi-fungsi yang dijalankan olehnya menurut Akta ini. Saraan.

(2) Seseorang anggota Majlis berhak mendapat pembayaran ganti bagi apa-apa perbelanjaan yang semunasabahnya dilakukan olehnya pada menjalankan tugas-tugas atau fungsi-fungsinya di bawah Akta ini.

7. Tiada seorang pun boleh dilantik atau dipilih menjadi anggota melainkan jika dia warganegara Malaysia. Kewarga-negaraan.

8. Seseorang anggota yang dilantik atau dipilih di bawah subseksyen (1) atau (2) seksyen 4 hendaklah disifatkan telah mengosongkan jawatannya— Pengosongan jawatan.

- (a) jika perlantikannya ditamatkan; atau
- (b) jika dia menjadi bankrap yang belum lepas; atau
- (c) jika dia diperakui tak sempurna akal; atau
- (d) jika dia telah disabitkan oleh mahkamah di Malaysia atau di tempat lain atas apa-apa kesalahan yang melibatkan fraud, kecurangan atau keburukan akhlak, atau atas apa-apa kesalahan yang boleh dihukum dengan

pemenjaraan (sama ada pemenjaraan sahaja atau sebagai tambahan kepada denda atau sebagai ganti denda) selama lebih daripada dua tahun; atau

- (e) jika dia meletakkan jawatannya dengan surat yang dialamatkan kepada Pengerusi dan perletakan jawatan itu diterima oleh Pengerusi; atau
- (f) jika dia tidak menghadiri tiga mesyuarat Majlis berturut-turut tanpa kebenaran Majlis; atau
- (g) jika dia berhenti menjadi pakar oftalmologi, juruoptik berdaftar atau optometris berdaftar.

Mesyuarat  
Majlis.

9. (1) Tertakluk kepada subseksyen (2), sesuatu mesyuarat Majlis hendaklah dipanggil oleh Pengerusi melalui notis secara bertulis kepada anggota-anggota lain dan mesyuarat itu hendaklah diadakan pada masa dan di tempat yang dinyatakan dalam notis itu.

(2) Menteri boleh, melalui notis secara bertulis kepada setiap orang anggota, mengarahkan supaya suatu mesyuarat diadakan pada masa dan di tempat yang dinyatakan dalam notis itu.

(3) Majlis hendaklah bermesyuarat sekurang-kurangnya enam bulan sekali.

Prosedur  
dalam  
mesyuarat.

10. (1) Pengerusi, jika hadir, hendaklah mempengerusikan semua mesyuarat Majlis.

(2) Jika Pengerusi tidak hadir pada mana-mana mesyuarat Majlis maka Timbalan Pengerusi hendaklah mempengerusikan mesyuarat dan jika kedua-duanya tidak hadir maka anggota-anggota yang hadir pada mesyuarat itu hendaklah memilih seorang daripada antara mereka untuk mempengerusikan mesyuarat itu.

(3) Pengerusi atau Timbalan Pengerusi, apabila dia mempengerusikan sesuatu mesyuarat, hendaklah mempunyai undi pemutus.

(4) Pada sesuatu mesyuarat Majlis, lima orang anggota membentuk kuorum.

(5) Semua soal yang dikemukakan dalam mesyuarat Majlis hendaklah diputuskan dengan majoriti biasa anggota-anggota yang hadir dan mengundi.

(6) Tertakluk kepada Akta ini, prosedur Majlis hendaklah sebagaimana yang ditentukan oleh Majlis.

11. (1) Majlis boleh melantik jawatankuasa-jawatankuasa untuk rnebantunya dalam menjalankan fungsi-fungsinya di bawah Akta ini. Jawatankuasa-jawatankuasa.

(2) Majlis boleh mewakili mana-mana fungsinya di bawah Akta ini, selain daripada kuasa perwakilan ini, kepada mana-mana jawatankuasa yang dilantik daripada kalangan anggota-anggota Majlis.

(3) Sesuatu perwakilan di bawah subseksyen (2) boleh dibatalkan oleh Majlis dan tidaklah menghalang Majlis daripada menjalankan mana-mana fungsinya di bawah Akta ini.

12. Akta Perlindungan Pihak Berkuasa Awam 1948 terpakai bagi apa-apa tindakan, guaman, pendakwaan atau prosiding terhadap Majlis atau terhadap mana-mana anggota, pegawai, pengkhidmat atau ejen Majlis berkenaan dengan apa-apa tindakan, pengabaian atau keingkaran yang dibuat atau dilakukan olehnya atas sifat yang sedemikian itu. Akta Perlindungan Pihak Berkuasa Awam. Akta 198

13. Semua anggota Majlis, semasa menjalankan kewajipan mereka sebagai anggota yang sedemikian itu, hendaklah disifatkan sebagai pengkhidmat awam mengikut pengertian Kanun Keseksaan. Pengkhidmat awam. NM.B Bab 45.

14. Menteri boleh, dari semasa ke semasa, mengeluarkan arahan-arahan am yang tidak tak konsisten dengan peruntukan-peruntukan Akta ini dan Majlis hendaklah melaksanakan arahan-arahan itu. Kuasa Menteri untuk mengeluarkan arahan

15. Majlis hendaklah memberi Menteri segala penyata dan maklumat berkenaan dengan aktiviti-aktivitinya sebagaimana yang dikehendaki oleh Menteri dari semasa ke semasa. Penyata.

## BAHAGIAN III

## PENDAFTARAN JURUOPTIK DAN OPTOMETRIS

- Pendaftar. 16. (1) Bagi maksud-maksud Akta ini maka hendaklah ada seorang Pendaftar.
- (2) Ketua Pengarah hendaklah menjadi Pendaftar.
- (3) Menteri boleh melantik seorang pegawai awam, yang tidak semestinya anggota Majlis, menjadi Timbalan Pendaftar.
- (4) Pendaftar boleh mewakilkan mana-mana fungsinya di bawah Akta ini atau mana-mana peraturan yang dibuat di bawah Akta ini kepada Timbalan Pendaftar yang, pada menjalankan fungsi-fungsi itu, hendaklah tertakluk kepada kawalan, pengawasan dan arahan Pendaftar.
- Daftar. 17. (1) Pendaftar hendaklah menyebabkan Daftar-Daftar yang berikut disimpan dalam bentuk yang ditetapkan;
- (a) Daftar juruoptik;
- (b) Daftar optometris.
- (2) Tanpa menjejaskan subseksyen (1), Daftar-Daftar boleh mengandungi apa-apa butir yang ditetapkan oleh Majlis.
- (3) Pendaftar hendaklah bertanggungjawab atas penyenggaraan dan penjagaan Daftar-Daftar mengikut peruntukan-peruntukan Akta ini dan peraturan-peraturan yang dibuat di bawah Akta ini.
- (4) Daftar-Daftar hendaklah disifatkan sebagai dokumen awam mengikut pengertian Akta Keterangan 1950.
- Akta 56. (5) Suatu perakuan di bawah tandatangan Pendaftar bahawa mana-mana orang—
- (a) didaftarkan atau tidak didaftarkan di bawah Akta ini; atau

- (b) pernah atau tidak pernah pada bila-bila masa didaftarkan di bawah Akta ini,

hendaklah menjadi keterangan muktamad tentang perkara-perkara yang disebutkan dalam perakuan itu.

18. (1) Mana-mana orang berhak didaftarkan sebagai juruoptik jika dia memuaskan hati Majlis bahawa dia berumur tidak kurang daripada lapan belas tahun, ialah seorang yang patut dan layak didaftarkan sebagai juruoptik dan memegang mana-mana kelulusan yang dinyatakan dalam Jadual Pertama.

Orang-orang yang berhak didaftarkan sebagai juruoptik.

(2) Majlis boleh membenarkan pendaftaran mana-mana orang sebagai juruoptik jika dia memuaskan hati Majlis bahawa dia berumur tidak kurang daripada lapan belas tahun, ialah seorang yang patut dan layak didaftarkan sebagai juruoptik dan—

- (a) telah menjalankan amalan mempreskripsi dan mendispens kanta mata selama tempoh yang tidak kurang daripada satu tahun sebelum sahaja Akta ini mula berkuatkuasa; atau
- (b) mempunyai kelulusan yang tidak dinyatakan dalam Jadual Pertama tetapi kelulusan itu dianggap sesuai oleh Menteri, selepas berunding dengan Majlis, bagi maksud-maksud pendaftaran.

(3) Majlis boleh, tertakluk kepada apa-apa syarat atau sekatan yang dikenakan oleh Majlis, membenarkan seseorang—

- (a) yang sedang menghadiri suatu kursus bagi mendapatkan mana-mana kelulusan yang dinyatakan dalam Jadual Pertama; dan
- (b) yang dikehendaki menjalani latihan amali sebagai sebahagian daripada kursus itu,

didaftarkan sementara dalam Daftar juruoptik selama tempoh latihan amali itu dan, walau apa pun seksyen 29, orang itu boleh menjalankan amalan seolah-olah dia ialah seorang juruoptik berdaftar.

(4) Jika Majlis berpuas hati bahawa seseorang yang telah didaftarkan sementara di bawah subseksyen (3)—

- (a) tidak atau tidak lagi menghadiri suatu kursus bagi mendapatkan mana-mana kelulusan yang dinyatakan dalam Jadual Pertama; atau
- (b) tidak atau tidak lagi menjalani latihan amali sebagai sebahagian daripada kursus itu; atau
- (c) telah melanggar mana-mana syarat atau sekatan yang dikenakan ke atasnya,

Majlis boleh membatalkan pendaftaran sementara orang itu dan memerintahkan supaya namanya dipotong dari Daftar.

Orang-orang yang berhak didaftarkan sebagai optometris.

19. (1) Mana-mana orang berhak didaftarkan sebagai optometris jika dia memuaskan hati Majlis bahawa dia berumur tidak kurang daripada lapan belas tahun, ialah seorang yang patut dan layak didaftarkan sebagai optometris dan memegang mana-mana kelulusan yang dinyatakan dalam Jadual Kedua.

(2) Majlis boleh membenarkan pendaftaran mana-mana orang sebagai optometris jika dia memuaskan hati Majlis bahawa dia berumur tidak kurang daripada lapan belas tahun, ialah seorang yang patut dan layak didaftarkan sebagai optometris dan mempunyai kelulusan yang Tidak dinyatakan dalam Jadual Kedua tetapi kelulusan itu dianggap sesuai oleh Menteri, selepas berunding dengan Majlis, bagi maksud-maksud pendaftaran.

Cara pendaftaran.

20. (1) Tertakluk kepada peruntukan-peruntukan Akta ini dan peraturan-peraturan yang dibuat di bawahnya, mana-mana orang yang mahu supaya didaftarkan di bawah Akta ini boleh memohon kepada Pendaftar dalam borang yang ditetapkan.

(2) Pendaftaran di bawah Akta ini hendaklah dilaksanakan dengan mencatatkan, dalam Daftar, butir-butir pemohon sebagaimana yang ditetapkan apabila fee yang ditetapkan dibayar.

(3) Tiap-tiap catatan dalam Daftar hendaklah ditandatangani oleh Pengerusi.

(4) Jika seseorang didaftarkan di bawah Akta ini, Majlis hendaklah menyebabkan supaya dikeluarkan kepadanya suatu perakuan pendaftaran di bawah tandatangan Pengerusi.

(5) Peruntukan-peruntukan seksyen ini hendaklah terpakai bagi sesuatu permohonan bagi pendaftaran sementara di bawah subseksyen (3) seksyen 18 dan bagi pendaftaran sementara itu sendiri.

21. (1) Majlis hendaklah mempunyai bidang kuasa tatatertib atas semua orang berdaftar. Bidang kuasa tatatertib Majlis.

(2) Majlis boleh menjalankan bidang kuasa tatatertib atas mana-mana orang berdaftar—

- (a) yang pendaftarannya telah didapati secara fraud atau salah nyataan; atau
- (b) yang diploma, sijil atau kelulusannya yang lain telah ditarik balik atau dibatalkan oleh universiti, kolej atau badan yang menganugerahkannya; atau
- (c) yang telah disabitkan oleh mahkamah di Malaysia atau di tempat lain atas apa-apa kesalahan yang melibatkan fraud, kecurangan atau keburukan akhlak atau yang telah dijatuhi hukuman pemenjaraan (sama ada pemenjaraan sahaja atau sebagai tambahan kepada denda atau sebagai ganti denda) selama tempoh yang lebih daripada satu tahun;
- (d) yang tidak berhak didaftarkan pada masa dia didaftarkan.

22. (1) Majlis boleh, pada menjalankan bidang kuasa tatatertibnya, mengenakan mana-mana hukuman yang berikut: Hukuman tatatertib.

- (a) memerintahkan supaya nama orang berdaftar itu dipotong dari Daftar; atau
- (b) memerintahkan supaya nama orang berdaftar itu digantung dari Daftar selama suatu tempoh yang difikirkannya patut; atau

- (c) membuat mana-mana perintah yang tersebut di atas tetapi menggantung pelaksanaannya, tertakluk kepada apa-apa syarat yang difikirkannya patut, selama suatu tempoh atau tempoh-tempoh yang tidak melebihi dua tahun; atau
- (d) memerintahkan supaya orang berdaftar itu dicela.

(2) Majlis boleh, dalam mana-mana kes, membuat apa-apa perintah yang difikirkannya patut berkenaan dengan pembayaran kos Pendaftar dan kos mana-mana pengadu atau kos orang berdaftar itu.

(3) Apa-apa kos yang diawardkan di bawah subseksyen (2) boleh didapatkan sebagai hutang sivil.

Siasatan.

23. (1) Sebelum membuat apa-apa perintah tatatertib, Majlis hendaklah mengadakan suatu siasatan.

(2) Orang berdaftar yang terhadapnya apa-apa pengaduan dibuat boleh diwakili oleh seorang peguam atau mana-mana orang yang diberikuasa oleh orang berdaftar itu secara bertulis.

(3) Dalam menjalankan siasatan Majlis tidak terikat oleh peruntukan-peruntukan Akta Keterangan 1950 atau oleh mana-mana prosedur undang-undang tetapi boleh menjalankan siasatan mengikut cara yang difikirkannya patut.

(4) Majlis boleh melantik seorang peguam untuk membantu Majlis.

(5) Majlis boleh menggantung, buat sementara waktu, pendaftaran orang berdaftar sementara menunggu keputusan Majlis atau pemberesan mana-mana rayuan.

Penyerahan  
balik  
perakuan  
pendaftaran.

24. (1) Jika nama seseorang orang berdaftar telah diperintahkan oleh Majlis supaya dipotong dari Daftar, orang itu hendaklah menyerahkan perakuan pendaftarannya kepada Majlis dalam tempoh empat belas hari dari penerimaan perintah itu.

(2) Mana-mana orang yang tidak mematuhi subseksyen (1) adalah melakukan suatu kesalahan.

25. (1) Mana-mana orang yang terkilan dengan apa-apa perintah yang dibuat berkenaan dengannya oleh Majlis di bawah seksyen 22 boleh merayu, mengikut peraturan-peraturan yang dibuat di bawah Akta ini, kepada Lembaga Rayuan yang ditubuhkan di bawah subseksyen (6) dan Lembaga Rayuan itu boleh, berikutan dengan itu, mengesahkan, mengakaskan atau rnengubah perintah yang dirayukan itu atau memberikan apa-apa perintah yang difikirkannya adil atau patut. Rayuan.

(2) Lembaga Rayuan boleh, dalam mana-mana kes, membuat apa-apa perintah yang difikirkannya patut berkenaan dengan pembayaran kos, dan apa-apa kos yang diawardkan boleh didapati sebagai hutang sivil.

(3) Walau apa pun subseksyen (1), Lembaga Rayuan tidaklah mempunyai kuasa untuk mendengar rayuan terhadap sesuatu perintah yang dibuat di bawah seksyen 22 melainkan jika notis rayuan diberikan dalam masa satu bulan dari penyampaian perintah itu.

(4) Majlis hendaklah memberikan kuatkuasa kepada apa-apa keputusan yang dibuat oleh Lembaga Rayuan.

(5) Keputusan Lembaga Rayuan adalah muktamad.

(6) Bagi maksud-maksud seksyen ini, maka hendaklah ditubuhkan suatu Lembaga Rayuan yang terdiri daripada—

(a) seorang Hakim Mahkamah Tinggi, sebagai Pengerusi, yang hendaklah dilantik oleh Yang di-Pertuan Agong selepas berunding dengan Ketua Hakim Negara; dan

(b) dua orang lain yang hendaklah dilantik oleh Yang di-Pertuan Agong.

(7) Seseorang anggota Lembaga Rayuan hendaklah, melainkan jika dia terlebih dahulu meletakkan jawatannya atau perlantikannya dibatalkan, memegang jawatan selama tempoh yang dinyatakan dalam suratcara yang melantiknya dan adalah layak dilantik semula.

(8) Tertakluk kepada Akta ini dan peraturan-peraturan yang dibuat di bawah Akta ini, prosedur Lembaga Rayuan hendaklah ditentukan oleh Lembaga itu.

Pemotongan  
nama oleh  
sebab  
kelemahan  
fizikal atau  
mental.

26. (1) Tanpa menjejaskan peruntukan-peruntukan subseksyen (4) seksyen 18 dan peruntukan-peruntukan seksyen 22, Majlis boleh memerintahkan supaya nama mana-mana orang berdaftar dipotong dari Daftar jika Majlis berpuas hati bahawa orang berdaftar itu tak upaya, oleh sebab kelemahan fizikal atau mental, menjalankan tugas-tugasnya sebagai juruoptik atau optometris.

(2) Bagi maksud memuaskan hatinya bahawa mana-mana orang berdaftar tak upaya, oleh sebab kelemahan fizikal atau mental, menjalankan tugas-tugasnya sebagai juruoptik atau optometris, Majlis hendaklah melantik suatu Lembaga Kajian Semula Perubatan yang hendaklah terdiri daripada tidak kurang daripada tiga orang pengamal perubatan untuk menjalankan siasatan atas setiap kes dan membuat syor-syor yang difikirkan patut oleh Lembaga itu.

(3) Peruntukan-peruntukan seksyen 24 dan 25 hendaklah terpakai bagi mana-mana orang yang namanya telah diperintahkan supaya dipotong dari Daftar di bawah seksyen ini.

Perubahan  
kepada  
Daftar.

27. Tanpa menjejaskan mana-mana peruntukan lain Akta ini, jika Majlis berpuas hati bahawa seseorang orang berdaftar—

- (a) telah meninggal dunia; atau
- (b) tidak lagi menjalankan amalan sebagai juruoptik atau optometris di Malaysia; atau
- (c) diterima masuk atau dikurung dalam mana-mana hospital mental di bawah peruntukan mana-mana undang-undang,

maka Majlis hendaklah menyebabkan supaya namanya dan semua butir yang berhubungan dengannya dipotong dari Daftar yang berkenaan.

28. (1) Jika nama seseorang orang berdaftar telah dipotong dari Daftar, dia boleh memohon supaya namanya dimasukkan semula ke dalam Daftar atas alasan bahawa disebabkan oleh sesuatu perubahan tertentu hal-hal keadaan yang telah berlaku semenjak tarikh pemotongan itu maka sepatutnyalah namanya dimasukkan semula sedemikian.

Kemasukan semula nama dalam Daftar.

(2) Apabila permohonan dibuat kepadanya, Majlis boleh, menurut budi bicaranya, memerintahkan supaya nama pemohon itu dimasukkan semula ke dalam Daftar.

(3) Seseorang yang terkilan dengan keputusan Majlis di bawah subseksyen (2) boleh merayu kepada Menteri dan keputusan Menteri adalah muktamad dan konklusif.

#### BAHAGIAN IV

##### AMALAN OPTOMETRI

29. (1) Tiada seorang pun boleh menjalankan amalan optometri melainkan jika dia seorang orang berdaftar.

Hanya orang-orang berdaftar sahaja boleh menjalankan amalan optometri

(2) Walau apa pun subseksyen (1) tetapi tertakluk kepada seksyen 30, tiada seorang pun boleh mernpreskripsi atau mendispens kanta lekap melainkan jika dia seorang optometris berdaftar.

(3) Subseksyen (1) dan (2) tidaklah terpakai bagi seorang pengamal perubatan.

(4) Mana-mana orang yang melanggar seksyen ini adalah melakukan suatu kesalahan.

30. (1) Walau apa pun subseksyen (2) seksyen 29, Majlis boleh, atas permohonan seseorang juruoptik berdaftar—

Majlis boleh membenarkan juruoptik mernpreskripsi dan mendispens kanta lekap.

(a) yang telah mernpreskripsi dan mendispens kanta lekap selama tempoh tiga tahun atau lebih sebelum sahaja tarikh Akta ini mula berkuatkuasa; atau

(b) yang telah mernpreskripsi dan mendispens kanta lekap selama tempoh yang kurang daripada tiga tahun sebelum sahaja tarikh Akta ini mula

berkuatkuasa dan, tertakluk kepada subseksyen (2), telah lulus, dalam tempoh enam tahun dari tarikh Akta ini mula berkuatkuasa, peperiksaan yang diadakan oleh Majlis,

membenarkannya terus mempreskripsi dan mendispens kanta lekap.

(2) Tiada seorang pun boleh dibenarkan menduduki peperiksaan yang disebutkan dalam perenggan (b) subseksyen (1) melainkan jika dia telah menamatkan, dalam masa satu tahun dari tarikh Akta ini mula berkuatkuasa, suatu kursus latihan yang diluluskan oleh Majlis dan telah menjalankan amalan mempreskripsi dan mendispens kanta lekap selama suatu tempoh yang tidak boleh kurang daripada perbezaan di antara tempoh tiga tahun dengan tempoh dia telah mempreskripsi dan mendispens kanta lekap sebelum Akta ini mula berkuatkuasa.

(3) Walau apa pun subseksyen (2) seksyen 29 dan semata-mata bagi maksud-maksud perenggan (b) subseksyen (1), seseorang juruoptik berdaftar yang disebutkan dalam perenggan itu boleh terus mempreskripsi dan mendispens kanta lekap selama tempoh yang tidak melebihi enam tahun dari tarikh Akta ini mula berkuatkuasa.

(4) Walau apa pun subseksyen (2) seksyen 29 dan subseksyen (1) seksyen ini, Majlis boleh, apabila permohonan dibuat oleh seseorang juruoptik berdaftar dan apabila Majlis berpuas hati bahawa pemohon telah menerima latihan yang sepatutnya, dan bahawa dia kompeten, dalam mempreskripsi dan mendispens kanta lekap, membenarkannya mempreskripsi dan mendispens kanta lekap.

(5) Majlis boleh, sebelum memberikan kebenarannya di bawah subseksyen (4), menghendaki pemohon lulus peperiksaan yang diadakan oleh Majlis.

(6) Kebenaran yang disebutkan dalam subseksyen (1) dan (4) hendaklah diberikan secara bertulis dalam apa-apa bentuk yang ditentukan oleh Majlis.

31. (1) Tiada seorang pun, selain daripada pengamal perubatan, boleh menggunakan suatu kaedah pengukuran daya penglihatan yang melibatkan penggunaan ubat.

Larangan terhadap penggunaan ubat dalam mengukur daya penglihatan.

(2) Walau apa pun subseksyen (1)—

(a) seseorang optometris berdaftar; atau

(b) seseorang juruoptik berdaftar yang dibenarkan mempreskripsi dan mendispens kanta lekap,

boleh menggunakan, bagi maksud-maksud refraktif, apa-apa ubat yang difikirkan oleh Majlis dari semasa ke semasa sesuai.

32. (1) Seseorang orang berdaftar yang berniat untuk menjalankan amalan sebagai juruoptik atau optometris selepas tiga puluh satu haribulan Disember mana-mana tahun hendaklah, tidak lewat daripada satu haribulan Disember tahun itu, membuat permohonan dalam borang yang ditetapkan dan membayar fee yang ditetapkan bagi mendapatkan suatu perakuan untuk menjalankan amalan sebagai juruoptik atau optometris dalam tahun yang berikutnya.

Perakuan pengamalan tahunan.

(2) Apabila diterimanya permohonan dan bayaran yang tersebut dalam subseksyen (1), Pendaftar hendaklah mengeluarkan suatu perakuan pengamalan tahunan kepada pemohon yang membenarkan pemohon menjalankan amalan sebagai juruoptik atau optometris dalam tahun yang baginya perakuan itu dikeluarkan.

(3) Tertakluk kepada subseksyen (4), sesuatu perakuan yang dikeluarkan di bawah subseksyen (2) hendaklah berkuatkuasa sehingga tiga puluh satu haribulan Disember tahun yang baginya perakuan itu dikeluarkan.

(4) Seseorang orang berdaftar yang tidak memohon untuk mendapatkan suatu perakuan pengamalan tahunan mengikut cara dan dalam tempoh yang dinyatakan dalam subseksyen (1) boleh, apabila dia membuat permohonan dalam borang yang ditetapkan dan apabila dia membayar fee tambahan yang ditetapkan, diberi suatu perakuan

pengamalan tahunan bagi tahun yang berikutnya, jika permohonan itu dibuat dalam bulan Disember mana-mana tahun, atau bagi baki tahun itu, jika permohonan dibuat pada atau selepas satu haribulan Januari mana-mana tahun.

(5) Walau apa pun apa-apa jua yang berlawanan dalam Akta ini, seorang orang berdaftar boleh menjalankan amalan sebagai juruoptik atau optometris tanpa perakuan pengamalan tahunan sehingga tiga puluh satu haribulan Disember tahun dia pertama kalinya didaftarkan sebagai juruoptik atau optometris dan, bagi maksud Akta ini dan mana-mana peraturan yang dibuat di bawah Akta ini, dia hendaklah disifatkan mempunyai perakuan pengamalan tahunan bagi tempoh itu.

(6) Sesuatu perakuan pengamalan tahunan dan sesuatu permohonan perakuan pengamalan tahunan hendaklah mengandungi alamat tempat utama pemohon menjalankan amalan dan semua tempat lain di mana pemohon menjalankan amalan, dan apa-apa pertukaran mana-mana alamat itu hendaklah diberitahukan oleh orang berdaftar itu kepada Pendaftar dan suatu pengendorsan pertukaran itu pada perakuan pengamalan tahunan hendaklah didapatkan daripada Pendaftar dalam masa tiga puluh hari dari pertukaran itu.

(7) Mana-mana orang yang tidak memberitahu Pendaftar, sebagaimana yang dikehendaki di bawah subseksyen (6), tentang apa-apa pertukaran alamat adalah melakukan suatu kesalahan.

(8) Suatu perakuan di bawah tandatangan Pendaftar bahawa mana-mana orang—

- (a) ialah atau bukan pemegang suatu perakuan pengamalan tahunan; atau
- (b) pernah menjadi atau tidak pernah menjadi pada bila-bila masa pemegang suatu perakuan pengamalan tahunan,

hendaklah menjadi keterangan konklusif tentang perkara-perkara yang tersebut dalam perakuan itu.

33. Seseorang yang—

- (a) menjalankan amalan sebagai juruoptik atau optometris tanpa suatu perakuan pengamalan tahunan yang sah; atau
- (b) berkongsi dengan seseorang yang menjalankan amalan sebagai juruoptik atau optometris tanpa suatu perakuan pengamalan tahunan yang sah; atau
- (c) mengambil kerja seseorang yang menjalankan amalan sebagai juruoptik atau optometris tanpa suatu perakuan pengamalan tahunan yang sah,

Penjalanan amalan tanpa perakuan pengamalan tahunan.

adalah melakukan suatu kesalahan dan tidaklah berhak mendapatkan apa-apa fee, hadiah, pembayaran atau kos yang ditanggung dalam masa dia atau mana-mana orang yang tersebut dalam perenggan (b) dan (c) tidak mempunyai perakuan pengamalan tahunan.

## BAHAGIAN V

### AM

34. Seseorang yang didaftarkan atau yang cuba mendapatkan pendaftaran bagi dirinya atau mana-mana orang lain di bawah Akta ini dengan membuat atau mengemukakan atau menyebabkan dibuat atau dikemukakan apa-apa kenyataan atau akuan palsu atau fraud sama ada secara lisan atau bertulis adalah melakukan suatu kesalahan.

Pendaftaran fraud.

35. (1) Seseorang yang tidak didaftarkan di bawah Akta ini adalah melakukan suatu kesalahan jika dia—

Kesalahan-kesalahan.

- (a) dengan sengaja dan dengan palsu memakai atau menggunakan nama atau gelaran "juruoptik" atau "optometris"; atau
- (b) dengan sengaja dan dengan palsu berpura-pura menjadi seorang orang berdaftar; atau
- (c) dengan sengaja dan dengan palsu berpura-pura berkelayakan untuk menjalankan amalan optometri; atau

- (d) dengan sengaja dan dengan palsu memakai atau menggunakan apa-apa nama, gelaran, tambahan atau perihalan yang memberi faham bahawa dia ialah seorang orang berdaftar atau bahawa dia diiktiraf di sisi undang-undang sebagai seorang juruoptik atau optometris; atau
- (e) dengan sengaja dan dengan palsu memakai atau menggunakan apa-apa nama, gelaran, tambahan atau perihalan, atau menggunakan apa-apa alat, yang direncanakan untuk mendorong mana-mana orang supaya mempercayai bahawa dia berkelayakan menjalankan amalan optometri; atau
- (f) menggunakan istilah "juruoptik" atau "optometris" atau sesuatu perkataan yang sama erti dengan salah satu istilah itu dalam apa-apa bahasa lain pada papan tanda di tempat amalannya dengan berupa sebagai menjalankan amalan optometri; atau
- (g) mengemukakan dirinya, melalui iklan atau selainnya, sebagai berkelayakan atau dibenarkan untuk menjalankan amalan optometri.

(2) Seseorang atau sesuatu firma adalah melakukan suatu kesalahan jika dalam masa orang atau firma itu menjalankan sesuatu perniagaan—

- (a) mana-mana orang yang diambil kerja oleh orang atau firma itu; atau
- (b) mana-mana anggota firma itu,

menjalankan amalan optometri tanpa didaftarkan di bawah Akta ini.

(3) Seseorang yang melakukan kesalahan di bawah seksyen ini, apabila disabitkan, boleh didenda tidak melebihi sepuluh ribu ringgit atau dipenjarakan selama tempoh yang tidak melebihi dua tahun atau keduanya.

36. (1) Tertakluk kepada subseksyen (2), tiada seorang pun boleh tnenjual apa-apa alat optik melainkan jika jualan itu dilaksanakan oleh atau di bawah penyeliaan seorang pengamal perubatan atau seorang orang berdaftar. Alat-alat optik.

(2) Subseksyen (1) tidak terpakai bagi penjualan sesuatu alat optik—

- (a) kepada pengamal perubatan atau orang berdaftar; atau
- (b) kepada pengilang atau peniaga alat optik bagi maksud perniagaannya; atau
- (c) kepada mana-mana pihak berkuasa atau orang yang bertanggungjawab bagi pengurusan—
  - (i) sesuatu hospital;
  - (ii) sesuatu klinik;
  - (iii) sesuatu rumah rawatan; atau
  - (iv) mana-mana institusi lain yang memberikan rawatan perubatan atau pembedahan dan yang diluluskan oleh Menteri; atau
- (d) kepada sesuatu jabatan kerajaan; atau
- (e) bagi maksud pengeksporthannya.

(3) Mana-mana orang yang melanggar subseksyen (1) adalah melakukan suatu kesalahan.

(4) Dalam apa-apa pendakwaan kerana menjual suatu alat optik dengan melanggar subseksyen (1), adalah menjadi pembelaan jika pembela membuktikan bahawa dia menjual alat itu sebagai suatu barang antik dan bahawa dia tidak tahu dan tiada sebab untuk mempercayai bahawa alat itu telah dibeli bagi maksud digunakan untuk membetulkan, memulihkan atau meringankan kecacatan penglihatan.

37. (1) Seseorang yang melakukan suatu kesalahan di bawah Akta ini yang baginya tiada penalti yang khusus diperuntukkan boleh, apabila disabitkan— Penalti am.

- (a) berkenaan dengan kesalahan kali pertama, didenda tidak melebihi seribu ringgit;

- (b) berkenaan dengan kesalahan kali kedua atau yang selanjutnya, didenda tidak melebihi dua ribu ringgit atau dipenjarakan selama tempoh yang tidak melebihi enam bulan atau kedua-duanya.

(2) Dalam hal sesuatu kesalahan yang berterusan, seseorang yang disabitkan di bawah Akta ini boleh didenda selanjutnya sebanyak lima puluh ringgit bagi setiap hari kesalahan itu berterusan selepas sabitan sebagai tambahan kepada penalti-penalti yang diperuntukkan di bawah perenggan (a) dan (b) subseksyen (1).

Kuasa untuk memasuki premis dan memeriksa dan menyita dokumen dsb.

38. (1) Bagi maksud-maksud Akta ini, seseorang pegawai awam yang diberikuasa secara bertulis oleh Ketua Pengarah boleh, dalam waktu perniagaan biasa, memasuki premis di mana seseorang orang berdaftar menjalankan amalan optometri atau di mana ada sebab yang munasabah untuk mempercayai bahawa seseorang menjalankan amalan optometri dan—

- (a) boleh memeriksa apa-apa dokumen, radas atau artikel yang disimpan atau digunakan berkaitan dengan amalan itu;
- (b) jika seseorang menjalankan amalan optometri tanpa berdaftar di bawah Akta ini, boleh menyita apa-apa dokumen, radas atau artikel yang disimpan atau digunakan berkaitan dengan amalan itu; dan
- (c) boleh menghendaki supaya maklumat, yang berhubungan dengan amalan itu, yang dinyatakan oleh orang diberikuasa itu diberikan kepadanya.
- (2) Mana-mana orang yang—
- (a) mengugut, menghalang atau mengganggu orang diberikuasa melaksanakan tugas orang diberikuasa itu; atau
- (b) enggan membenarkan orang diberikuasa memeriksa apa-apa dokumen, radas atau artikel; atau

- (c) enggan menunjukkan apa-apa dokumen, radas atau artikel untuk diperiksa oleh orang diberikuasa; atau
- (d) enggan menyerahkan apa-apa dokumen, radas atau artikel kepada orang diberikuasa; atau
- (e) enggan memberikan apa-apa maklumat yang dikehendaki oleh orang diberikuasa; atau
- (f) cuba melakukan mana-mana perbuatan di atas, adalah melakukan suatu kesalahan.

(3) Jika seseorang orang diberikuasa menyita apa-apa dokumen, radas atau artikel, dia hendaklah memberikan resit yang bertandatangan bagi dokumen, radas atau artikel itu.

(4) Mana-mana orang yang menjalankan kuasa-kuasa di bawah seksyen ini hendaklah menunjukkan surat pemberikuasaannya apabila diminta.

39. Seseorang pegawai awam yang diberikuasa secara bertulis oleh Ketua Pengarah boleh menjalankan apa-apa pendakwaan berkenaan dengan apa-apa kesalahan di bawah Akta ini. Penjalanan pendakwaan.

40. (1) Jika sesuatu pertubuhan perbadanan melakukan suatu kesalahan di bawah Akta ini, tiap-tiap pengarah dan pengurusnya adalah, melainkan jika dia membuktikan bahawa kesalahan itu dilakukan tanpa pengetahuannya, bersalah atas kesalahan itu. Pertubuhan perbadanan dan perkongsian.

(2) Jika sesuatu perkongsian melakukan suatu kesalahan di bawah Akta ini, tiap-tiap pekongsi adalah, melainkan jika dia membuktikan bahawa kesalahan itu dilakukan tanpa pengetahuannya, bersalah atas kesalahan itu.

41. Menteri, selepas berunding dengan Majlis, boleh, melalui perintah yang disiarkan dalam *Warta*, menambah kepada, memotong daripada atau meminda senarai kelulusan yang boleh didaftarkan yang terdapat dalam Jadual-Jadual. Kuasa Menteri meminda Jadual-Jadual.

Peraturan-  
peraturan.

42. (1) Menteri, selepas berunding dengan Majlis, boleh membuat peraturan-peraturan untuk menetapkan apa-apa jua yang dikehendaki atau dibenarkan ditetapkan di bawah Akta ini dan pada amnya untuk melaksanakan tujuan-tujuan dan maksud-maksud Akta ini.

(2) Khususnya dan tanpa menjejaskan keluasan subseksyen (1), peraturan-peraturan itu boleh menetapkan mana-mana atau kesemua yang berikut:

- (a) tugas-tugas Pendaftar;
- (b) bentuk Daftar, isi kandungannya dan cara menyimpannya;
- (c) fee yang kena dibayar di bawah Akta ini dan apa-apa pengecualian daripadanya sebagaimana yang difikirkan patut oleh Menteri;
- (d) bentuk dan cara permohonan pendaftaran dan permohonan perakuan pengamalan tahunan hendaklah dibuat;
- (e) cara membuktikan kelayakan untuk menjalankan amalan sebagai juruoptik atau optometris;
- (f) pengurusan harta Majlis dan pengauditan akaun-akaunnya;
- (g) prosedur yang hendaklah diikuti berhubungan dengan siasatan-siasatan yang diadakan di bawah Akta ini;
- (h) prosedur yang hendaklah diikuti berhubungan dengan rayuan-rayuan di bawah seksyen 25;
- (i) prosedur pemilihan anggota-anggota Majlis;
- (j) cara menjalankan peperiksaan-peperiksaan dan perkara-perkara yang akan diperiksa;
- (k) cara bagaimana kursus-kursus latihan yang disebutkan dalam seksyen 30 hendaklah dijalankan dan sukatan pelajaran bagi kursus-kursus itu;
- (l) bentuk apa-apa perakuan atau dokumen lain yang dikehendaki di bawah Akta ini.

JADUAL PERTAMA  
(Seksyen 18)

SENARAI KELULUSAN YANG BOLEH DIDAFTARKAN  
BAGI JURUOPTIK

<i>Negeri tempat kelulusan diberikan</i>	<i>Nama Yayasan yang membenkan kelulusan</i>	<i>Perihal kelulusan</i>
India	Shri Vatsnav Polytechnic	Diploma in Optometry
	Municipal Eye Hospital Kamathipura, Bombay	Diploma in Optometry
	Sarojini Devi Eye Hospital, Hyderabad	Diploma in Optometry
	Government Eye Hospital Egmore, Madras	Diploma in Optometry
	Sitapur Eye Hospital, Sitapur	Diploma in Optometry
Indonesia	Akademi Refraksionis Optisien, Surabaya	Diploma in Optometry
Filipina	Central College of Philippines	Doctor of Optometry
	South Western University	Doctor of Optometry
United Kingdom	The Association of Dispensing Opticians	Fellow of the Association of Dispensing Opticians
	Bradford Technical College	Fellow of the Association of Dispensing Opticians
	City and East London College of Applied Optics	Fellow of the Association of Dispensing Opticians
	Glasgow College of Technology	Diploma in Ophthalmic Dispensing

JADUAL KEDUA  
(Seksyen 19)

SENARAI KELULUSAN YANG BOLEH DIDAFTARKAN  
BAGI OPTOMETRIS

<i>Negeri tempat kelulusan diberikan</i>	<i>Nama Yayasan yang memberikan kelulusan</i>	<i>Perihal kelulusan</i>
Australia	Queensland University of Technology	Bachelor of Applied Science (Optometry)
	University of Melbourne	Bachelor in Optometry
	University of New South Wales	Bachelor in Optometry
Kanada	University of Waterloo	Doctor of Optometry

<i>Negeri tempat kelulusan dtberikan</i>	<i>Nama Yayasan yang memberikan kelulusan</i>	<i>Perihal kelulusan</i>
Hong Kong	Hong Kong Polytechnic Institute of Medical and Health Care	Bachelor of Science Diploma in Optometry
India	Ehte School of Optometry, Madras	Bachelor in Optometry
Malaysia	Universiti Kebangsaan Malaysia	Sarjana Muda Optometri
New Zealand	University of Auckland	Bachelor of Science in Optometry
Nigena	University of Benin	Bachelor of Science in Optometry
United Kingdom	University of Aston in Birmingham	Bachelor of Science in Ophthalmic Optics
	University of Bradford	Bachelor of Science in Ophthalmic Optics
	City University London	Bachelor of Science in Ophthalmic Optics
	University of Manchester Institute of Science and Technology	Bachelor of Science in Ophthalmic Optics
	University of Wales Institute of Science and Technology, Cardiff	Bachelor of Science in Ophthalmic Optics
	Glasgow College of Technology	Bachelor of Science in Optometry
Amerika Syarikat	Indiana University, Bloomington	Doctor of Optometry
	Ohio State University	Doctor of Optometry
	University of California, Berkeley	Doctor of Optometry
	University of Houston	Doctor of Optometry
	University of Alabama in Birmingham	Doctor of Optometry
	New York State University	Doctor of Optometry
	Illinois College of Optometry Chicago	Doctor of Optometry
	The New England College of Optometry, Boston	Doctor of Optometry
	Pacific University of Oregon	Doctor of Optometry
	Southern College of Optometry, Memphis	Doctor of Optometry
	The Southern California College of Optometry	Doctor of Optometry
Ferris State University	Doctor of Optometry	
University of Missouri. St. Louis	Doctor of Optometry	

## HURAIAN

Rang Undang-Undang ini bertujuan mengadakan peruntukan mengenai pendaftaran juruoptik-juruoptik dan optometris-optometris dan bagi mengawal amalan optometri.

2. *Bahagian I* Rang Undang-Undang, selain daripada mengadakan tajuk ringkas dan takrif, bertujuan membenarkan Menteri menetapkan tarikh mula berkuatkuasanya Rang Undang-Undang ini.

3. *Bahagian II* Rang Undang-Undang bertujuan mengadakan peruntukan mengenai penubuhan Majlis Optik Malaysia. Anggota-anggota Majlis akan termasuk pakar oftalmologi, optometris dan juruoptik yang mewakili sektor awam dan swasta. Ketua Pengarah Kesihatan akan menjadi Pengerusi. *Fasal 5, 6 dan 7* bertujuan mengadakan peruntukan mengenai tempoh jawatan, saraan dan kehendak kewarganegaraan seseorang anggota Majlis. *Fasal 8* memperkatakan pengosongan jawatan oleh seseorang anggota Majlis. *Fasal 10* bertujuan mengadakan peruntukan mengenai prosedur dalam mesyuarat-mesyuarat Majlis. *Fasal 11* bertujuan membenarkan Majlis melantik jawatankuasa-jawatankuasa untuk membantunya menjalankan fungsi-fungsinya. *Fasal 14* bertujuan memberi Menteri kuasa yang lazim diberikan untuk mengeluarkan arahan-arahan am kepada Majlis. *Fasal 15* bertujuan membuat peruntukan supaya Majlis memberikan penyata dan maklumat yang dikehendaki oleh Menteri.

4. *Bahagian III* Rang Undang-Undang adalah berkenaan dengan pendaftaran juruoptik dan optometris. *Fasal 16* bertujuan melantik Ketua Pengarah sebagai Pendaftar dan *fasal 17* bertujuan mengadakan dua Daftar berasingan masing-masingnya bagi juruoptik dan optometris. *Fasal 18 dan 19 dan Jadual-Jadual* menyatakan kelayakan-kelayakan yang membolehkannya didaftarkan sebagai juruoptik atau optometris. Peruntukan dibuat berkenaan dengan orang-orang yang telah menjalankan amalan sebagai juruoptik sebelum Akta yang dicadangkan ini mula berkuatkuasa. Jika seseorang telah menjalankan amalan sebagai seorang juruoptik selama satu tahun atau lebih sebelum tarikh Akta mula berkuatkuasa, dia boleh didaftarkan sebagai seorang juruoptik. Orang-orang yang mempunyai kelulusan yang disenaraikan dalam Jadual-Jadual, atau yang mempunyai kelulusan yang tidak disenaraikan dalam Jadual-Jadual tetapi dikira sesuai untuk didaftarkan, boleh juga didaftarkan di bawah Akta yang dicadangkan. *Fasal 20* bertujuan mengadakan peruntukan mengenai cara membuat pendaftaran. *Fasal 21* bertujuan menyatakan bidang kuasa tata tertib Majlis. *Fasal 22* bertujuan menyatakan hukuman-hukuman tata tertib yang boleh dikenakan oleh Majlis. *Fasal 23* bertujuan mengadakan peruntukan mengenai siasatan yang hendaklah diadakan oleh Majlis sebelum membuat sesuatu perintah tata tertib. *Fasal 24* bertujuan menghendaki seseorang yang

namanya telah dipotong dari Daftar menyerahkan balik perakuan pendaftarannya. *Fasal 25* bertujuan memberikan peluang merayu terhadap keputusan Majlis. *Fasal 26* bertujuan mengadakan kuasa bagi Majlis memotong dari Daftar nama orang-orang yang menjadi tak upaya melaksanakan tugas-tugas juruoptyk atau optometris disebabkan oleh kelemahan fizikal atau mental. *Fasal 27* bertujuan memberikan kuasa kepada Majlis memotong nama orang-orang lain yang terlentu dari Daftar. *Fasal 28* bertujuan membenarkan seseorang orang berdaftar yang namanya telah dipotong dari Daftar memohon supaya namanya dimasukkan semula ke dalam Daftar jika dia memuaskan hati Majlis bahawa disebabkan oleh perubahan hal keadaan semenjak tarikh pemotongan namanya itu maka sepatutnyalah namanya dimasukkan semula. Ia juga membuat peruntukan bagi rayuan kepada Menteri.

5. *Bahagian IV* Rang Undang-Undang adalah berkenaan dengan amalan optometri. *Fasal 29* bertujuan membenarkan hanya orang-orang berdaftar sahaja menjalankan amalan sebagai juruoptyk atau optometris. *Fasal 30* membolehkan Majlis membenarkan juruoptyk-juruoptyk tertentu mempreskripsi dan mendispens kanta lekap walaupun pada amnya Rang Undang-Undang ini tidak membenarkan juruoptyk-juruoptyk berbuat demikian. *Fasal 31* bertujuan melarang penggunaan ubat untuk mengukur daya penglihatan. *Fasal 32* memperkatakan perakuan pengamalan tahunan dan *fasal 33* bertujuan menjadikannya suatu kesalahan jika seseorang orang berdaftar menjalankan amalan tanpa perakuan pengamalan tahunan yang sah,

6. *Bahagian V* Rang Undang-Undang mengandungi peruntukan-peruntukan am. *Fasal 34* adalah berkenaan dengan pendaftaran secara fraud. *Fasal 35* memperkatakan kesalahan-kesalahan secara amnya. *Fasal 36* bertujuan mengenakan sekatan-sekatan tertentu ke atas penjualan alat-alat optik. *Fasal 37* bertujuan mengadakan peruntukan mengenai penalti yang boleh dikenakan ke atas seseorang yang disabitkan atas suatu kesalahan di bawah Rang Undang-Undang ini. *Fasal 38* bertujuan membenarkan pegawai-pegawai awam yang diberikuasa oleh Ketua Pengarah memeriksa premis yang digunakan oleh orang-orang yang menjalankan amalan optometri. Ia juga bertujuan membenarkan pegawai-pegawai awam itu menyita dokumen-dokumen, radas-radas, dan artikel-artikel. *Fasal 39* bertujuan membenarkan pegawai-pegawai awam yang diberikuasa oleh Ketua Pengarah menjalankan pendakwaan di bawah Rang Undang-Undang. *Fasal 40* bertujuan menjadikan pengarah atau pengurus sesuatu pertubuhan perbadanan atau pekongsi sesuatu firma juga bersalah atas sesuatu kesalahan yang dilakukan oleh pertubuhan perbadanan atau firma itu melainkan jika dibuktikan bahawa kesalahan itu dilakukan tanpa pengetahuannya. *Fasal 41* bertujuan membenarkan Menteri, selepas berunding dengan Majhs, meminda Jadual-Jadual. *Fasal 42* bertujuan membenarkan Menteri, selepas berunding dengan Majlis, membuat peraturan-peraturan.

*IMPLIKASI KEWANGAN*

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini. [PN. (U<sup>2</sup>) 1020,]